

四庫全書

集部

欽定四庫全書

松桂堂全集卷九

吏部侍郎彭孫適撰

題畫

好山每如畫好畫復如真此解本難轉誰為明眼人
素策一以開宛然巖壑趣不假買山資何須濟勝具

和詡庵春日遊支硎山之作

十里方塘放畫舟筍輿蠟屐更追遊花前欲洒楊朱淚

海內誰憐越石囚照水綺羅明落日過雲絲管亂春愁
玉堂學士風流甚一酌金樽散百憂

上洋農

嗟哉上洋農耕田一何苦種秔十畝餘經夏不得雨陂
池變為田禾苗化成土粒食不須言官稅何從補里胥
雜還來追呼怒如虎抱耒入市屢聊用質子錢子錢苦
無多僅可供酒筵此日行已過後日還復然地著難永
日流亡轉可憐穠莖雖云勤不如逢歲年蠲租下明詔

不若長吏賢

雨中舟行

平川一帶碧潺湲
青浦城西刺客船
如有如無宜麥雨
不寒不暖簇蠶天
坐侵衣袂憐新綠
行近人家起暮烟
欲寄相思傷遠道
東風芳草自芊綿

客中漫興

葑溪迴帶古招提
樹影波光入望迷
種竹新畦梅雨歇
護花小院藥欄低
金雞天上傳消息
銅馬山東罷鼓鼙

暇日不妨頻載酒東林深處聽黃鸝

幽居有客近經過相訊長安事若何
謫吏競迴玄菟塞降王新渡葉榆河
中原已見銷金甲初服何妨老芟荷
此去五湖應不遠烟波隨地一漁蓑

芍藥花開入夏初青雲回首故人疎
半年憔悴天涯客兩字平安海上書
小墅桑麻鳴戴勝高臺麋鹿下姑胥
霸圖銷歇韶光改一枕春風午夢虛

繁花春盡尚嫣然七里方塘綠水邊
細雨疎簾書帙潤

斜陽孤店酒旗懸山中求友多黃鳥客裡催歸有杜鵑
羈旅情懷消未得道公塔院學逃禪

雲間送董蒼水之繁昌

今我来葺城往還君最熟忽然取別客樓中高駕風帆
向姑孰姑孰山川何秀麗千巖萬壑相虧蔽荻港雲繁
鎖驛亭赭圻日落搖江裔此地登臨足快哉此行經月
却須回到日正逢梅雨過歸時應見藕花開我家秦駐
小山傍經年不歸渺相望因君更唱驪駒曲使我低回

欲斷腸

雲間送友人歸海上

相逢故鄉人却在他鄉處還向他鄉折柳條送君仍到
故鄉去去路沿洄直向西峭帆高挂夕陽低曉行渺口
潮如掌暮宿當湖水拍堤君到家園能計日憑君一為
傳消息顏顏已自困風塵酒態詩狂消未得

客樓晚起

小閣朝寒客思慵潤生衾簟雨餘濃薄遊已自經三度

清興猶然背九峰澄碧當窻官舍樹疎聲落枕上方鐘
高樓極望江湖濶一夜風雷起臥龍

五日風雨與家兄渭臣對飲

林木朝隤鬱未開微涼颯颯集樓臺弟兄客舍聯床影
風雨山城五日杯墟里孤烟沉白苧江湖新漲走黃梅
鄉心遠逐南流水柴辟亭前去不回

層陰漠漠接平蕪急雨初收暑欲無五月輕寒侵白袷
三江旅食冷青菰緱欲問齊公子香草空憐楚大夫

酒後憑陵千載思悲風吹入角聲孤

臥病

臥病成吾懶知交迹亦疎坐聽高閣雨愁絕故園書
火侵緇帙梅陰潤玉除江南卑濕地五月尚樓居

病起

病起當清暑高樓雨過初林傳天籟入窻引夕陰虛越
燕移巢去吳吟伏枕餘江城淹歲月不為待鱸魚

病中聞蒼水歸自繁昌以詩代訊

澱湖五月片帆飛
徂暑還家換客衣
客裏送君行作客
還從客裏見君歸

五茸城下記相逢
姑孰亭邊問去踪
却笑長卿游未遂
依然抱病客臨邛

空館無人臥起遲
撲簾梅雨益淒其
楚天北望思君日
正是宣城見憶時

天馬歌寄晚九

君不見天馬來西極
倏儻權奇人未識
奮身忽上閭闔

門化若鬼神之不測又不見怒鵬橫絕漢翻然直起垂
天翰凌空一繭九萬里毛羽紛紛何足美君今二十正
盛年才華傑出流輩間龍媒絕影非難事羊角培風亦
等閒人生貴在抒懷抱一躍雲津猶小小百年事業何
其多丈夫立身須及早爾復高堂有老親十年于汝責
成人紅顏白髮不相待恒恐花開非我春晚九復晚九
為君思之久年華駛若隙中駒少壯應須努力否乃知
古人捧檄有深意富貴浮雲亦何有

送宋尚木之任潮州

一麾出守見風流
碧海蒼梧復勝遊
去路江雲驅溽暑
到時嶺樹入清秋
金城遠跨湖山盛
玉簡深探洞壑幽
仙吏自然無俗韻
褰帷還得近瀛洲

晨起成一詩

客有登樓思經年
尚薄遊城烏猶晚
集林葉已先秋託
興鱸魚膾懷人桂
樹舟江潮通谷水
空逐故鄉流

秋夜絕句

颯颯西風入旅愁江天迢遞獨登樓故園此夜堪腸斷
露冷山堂桂樹秋

戲賦鵲頭

金沙吳東昇善為星學寓於雲間雲間人以鵲頭
目之吳語謂人不慧者曰鵲頭也葉炳霞路湘舞
皆與東昇狎為賦鵲頭詩十二韻索予和因戲應
之

是物宜馴玩依人飽粃糠品形生自卯辨族羽如霜波

渚鴛同泛池濠鴨並藏柳嬌黃尚嫩笙暖韻輕揚素練
溪堪濯銀肪玉可當清波紅掌映白毳綠蘋香地擅曇
村勝湖臨講院長菹珍齊入饌芍藥細為糖陽羨籠偏
小於陵客漫嘗片腴悲鄧叟一鬢傲劉郎庖割寧知命
肥甘實起歿寄聲同侶者戒慎在壺觴

答孔厓秋

徙倚高樓吹朔風川原秋盡葉初紅天涯歲晏誰相問
曲裏陽春爾自工雁陣衝雲寒影斷江聲挾雨夜潮通

凭欄忽有歸與嘆客路淒涼霜露中

送王喜齋還常熟

元禮龍門許暫窺十年生死見交期青箱世業傳今日
黃綺衣冠憶往時蕭寺談玄松茗熟南窗散帙竹風披
征帆一發虞山道浦雁江雲寄所思

湖上蘭橈去住頻寒流無際欲傷神經年岐路無知己
幾度他鄉別故人白雁分飛帆影疾丹楓搖落客愁新
歸舟載得鱸如雪莫厭江城旅食貧

七夕飲徐振子園亭作歌示歌起

七月七日暑未平清籟不至秋陽明園居謝客深閉戶
千樹萬樹皆蟬鳴晚來愛此池上酌林水清陰紛漠漠
參差月出影漸高露濕闌干梧子落主人好客不好酒
杯杓不勝長在手容止風流絕可觀談諧雅令誰堪偶
繆生狂態最不羣持盃吐氣如烟雲鴟夷滑稽轉不竭
一石五斗總未醺大聲疾呼出門去袖懷餅餌遺細君
酒闌客散塊無侶淡淡銀河粲牛女還把旨酒問靈辰

吾豈匏瓜長獨處

沈侯席上醉歌

沈侯意氣何孤迥，儒雅風流復誰並。
結客常傾六郡豪，棄官新買三江艇。
我客江鄉四序轉，與君相愛時相見。
文酒猶能恣唱酬，登臨每自陪遊宴。
秋來搖落動離魂，繾綣緜袍古道存。
邀騎帳下黃驄馬，醉倒花前白玉樽。
花枝入手酒光濕，秦箏促柱冰絲急。
微呈玉齒聲易哀，怒拔青萍髮上立。
感君意氣為君歌，當筵更盡金叵羅。

黃花已老朱顏酡丹楓欲落江水波歲云暮矣君奈何
和詗庵乞鶴歌兼呈貽上

玉堂學士謫仙人視草先朝墨尚新長安一夕秋風起
忽憶江東紫帶尊窈窕玉峯天際落此中高卧何寥廓
換酒常拋佩下魚歸裝但載揚州鶴王郎本具凌霄姿
郡齋無事閒賦詩竹亭鶴柴清如水為政風流自一時
何以贈我九臯禽何以報之白雪吟二子風神堪掩映
千秋寄託獨遙深知君好鶴兼好山山堂謝客長閉關

予亦無心市朝者終年抱來心自閒岩居倘許尋前約
白石清泉共往還

青浦舟次

揚鈴擊汰曉相催百里青溪半日迴江浦秋深蓴菜老
汀洲水落蓼花開地通三泖潮爭上節近重陽雨易來
莫向天南更回首暮雲鄉樹不勝哀

白龍潭泛舟

搖落蒹葭玉露濃座中賓客半萍踪何來畫舫餘青雀

無復澄潭起白龍
秋水孤芳塞杜若
遙山九點削芙蓉
可憐紅葉秦谿道
歸棹經年悵莫從

送邵冕仲歸餘姚營葬

東還正值暮冬寒
故里松楸掩淚看
客子風塵驚短褐
美人情緒託明玕
歌殘魚鉞霜侵舍
唱罷驪駒雪滿鞍
同作吳吟君最苦
越江歸路更漫漫

壬寅除夕

吳客歸時歲漸分
庭梅已自吐氤氲
寒燈欲盡經年話

好夢難邀隔岫雲
入誦新詩憐驥子
聞春清怨譜桐君
中宵更撥枯爐坐
柏葉香殘試再熏

松桂堂全集卷九

欽定四庫全書

松桂堂全集卷十

吏部侍郎彭孫適撰

正月十七日振仲七兄招往東郊園中觀梅盡
醉而返仲兄有詩因依韻成律

曲曲軒楹面面湖春醪初熟未須沽
親人海島紛容與
入座花香乍有無
世態徒然爭鄭璞
時名空自逐韓盧
不如醉臥芳林下
月落前谿雪滿途

維申招飲牡丹花下不得赴以二詩答謝

春來日日困春醒
高枕虛堂午夢清
正好開簾迎社燕
不妨求友待林鶯
微寒尚覺花風淺
遲日初薰穀雨晴
珍重故人良讌會
飛牋空為欸柴荆

同人選勝促飛觴
芍藥花開正艷陽
繞幕雲深初度曲
隔簾風細乍聞香
數盈金谷催詩急
漏盡銅烏卜夜長
如此高懷真不惡
春愁何意苦相妨

春盡率然有作

游絲飛絮弄輕盈乳燕流鶯自在鳴竹葉酒當婪尾熟
清和天為釀花晴偶然客至相為醉但使身閑亦自輕
莫遣春愁殢今夕共君坐聽曉鐘聲

適客有誦閨仙三
月正當三十日一

絕者故落
句一及之

寄王七禮吉時在十一司李署中

薊北門下斜街宅天寒歲暮霜風坼對床清夜語不休
往往東方曙烟白余既栖栖吳越間君亦歸耕長白山
山川迢遞二千里極目天涯見雲水五載相思道路難

欽定四庫全書

松村堂金書
卷十

故人何處訊眠餐時向揚州問歷下還因歷下憶長安
今來一眺春江碧再得相逢話疇昔郡齋弔古定題詩
一裂齊紈寄吳客

答貽上

詞人寥落老撿觚矯首中原孰並驅狎主齊盟君是長
同遊燕市歲云徂客來競折紅蕖麗歌罷誰憂白雪孤
到處山川留逸唱風流還似大蘇無

作者千秋有代興使君高寄迥峻嶒羣山海內尊東岱

絕調人間在廣陵官閣但攜珠樹鶴宦情真似玉壺冰
燕城日暮邊風急明遠歌成思不勝

送和李侍郎憶洞庭之作

縹緲山川憶洞庭岳陽樓外水冥冥夢迴瑟瑟千峯碧
望入湘帆九面青芳草舊遺公子珮清秋曾泛使臣星
郢歌一奏堪腸斷莫使江南逐客聽

作四絕句書箴致佛車

山左風流王佛車烏衣門第最清華今朝癡叔筵頭見

玉樹何曾屬謝家

燕山霜月白紛紛
蕭寺鐘寒竟夕聞
曾與元方同把臂
論交今日得陳羣

日日沉酣老步兵
醉中高眺蜀岡晴
竹林此日陪清讌
又見當時阮始平

清暑山堂日未曛
新詩題罷重思君
相尋官舍元無事
寫得羊欣白練裙

平山堂懷古

春盡平山長薜蘿
虛堂寂寞少經過
歐公一往空陳迹
羈客重來起浩歌
京口晴雲江樹坼
蜀岡春草墓田多
低回千載情何限
斜日蕪城奈晚何

蜀岡眺望

平岡徙倚起悲風
回首鄉關思不窮
芳草多情春後長
碧雲無際暮天空
蜀川地接江流外
秦塞人來夕照中
莫更披榛尋往事
烟蕪一帶是隋宮

弔迷樓故址

複道千門清夜遊
隋皇曾此幸揚州
翠華不返當年夢
碧蘚空生舊日樓
欲認離宮垂柳盡
似傷亡國芰荷秋
至今江上傳遺恨
一曲楊花起暮愁

揚州逢玉行有贈

王程春草碧參差
粉署含香入直時
共說山郎無長物
懸知水部有新詩
白門柳盡懷人遠
朱雀桁開擁傳遲
自笑披裘江上客
賞音千載得鍾期

作歌送孫無言歸黃山故居

軒皇採樂處間在黃山中左挾容成子右把浮丘公一
朝丹成上天去千秋想像橋陵宮此山高與蒼穹逼至
今洞壑多幽特窈窕龍嵒三十峯峯峯皆作芙蓉色孫
郎本是好奇者家在黃山西嶺下問津曾訪武陵春扶
筇每到匡廬社觀濤江上偶乘槎忽憶山中桂樹花丹
梯翠壁不歸去玄猿白鶴空咨嗟送君歸棹清溪水清
溪千仞下見底臨風揮手一長往高臥清泉白石裡蘇
門先生薄世榮君今亦逃身後名抱琴他日來相訪聽

爾鸞吟鳳吹聲

贈龍師

遠道思君日西風落葉初曾從吳市客一寄武林書小
艇江潮急孤城夏雨疎相逢還問訊歸計定如何

輓房儀凡樞部興公尊先生也甲申之變以憂
憤而卒

米脂亂天網咸秦實禍始豈無清流人紛紜受驕餌房
公抗奇節秉心終不貳白璧絕衆汙黃冠非我意揮手

謝所親從容遂其志生平軌聖賢成仁與取義攀髯既
有時沒齒乃無媿

龔勝不愛死范滂不苟生古來志節士歷久彌堅貞貂
蟬座上客徒羨朝槿榮淹忽隨腐草一死鴻毛輕皎皎
司馬節百世流芳聲祀公以俎豆易公以嘉名高風激
千古興彼頑懦情

讀貞靖先生遺事感賦贈興公

大澤孤鳴已自疑鼎湖龍去不勝悲氣為河嶽生偏壯

力謝刀圭死不辭在昔專城無一士至今獨行有孤兒
何人執簡徵遺事玉管銀毫好綴詞

賊渡河入秦郡邑皆不守三川士大夫多受汙者
惟房公潔身全節賊索公不得執興公於獄榜掠
備極身無完膚故五六聯及之己亥之冬原人祀
公以特祠私謚為貞靖先生

維揚送興公之白下

繁華猶說石頭城宮闕年年蔓草生江艇進時無暑氣

山陵到處有秋聲
湖干弄笛人何在
橋畔吹簫月正明
可惜揚州好風景
芙蓉開日送君行

興公來全出東郭
訪豹人不遇見公子
應門辭令敏給
因有此作

東郭招尋地
高人此鑿坏
浮榮看木槿
清嘯答庭槐
凡鳥題詩去
家禽對客來
何妨同解帶
長日得徘徊

再占一律送興公

秦川公子不思家
進艇江天正暮霞
相見又攀隋苑柳

此行還看北門花
伍胥江口潮初長
黃歇山頭日未斜
好向秋風登覽處
一裁新句寄天涯

題龔賢山人畫寄吳方漣侍御

白下山人嗜奇癖
濡毫寫就嵯峨碧
萬壑千崑尺幅中
因風一寄西臺客
十載曾聽長樂鐘
故山夢想玉芙蓉
功成他日拂衣去
高臥蓮花若箇峯

題張翀畫花鳥冊子

耕塢先生為余言
張翀山水花鳥妙絕天下
僑居

秦淮意致蕭遠居然晉人風味恨生不同時目中
不見此等人適梅岑以此冊索題因系以二絕後
有覽者當不禁今昔之同情也

畫苑人傳粉本清宛然花鳥弄春晴黃筌一往張翀死
今古風流想像生

往事追尋歲月賒淮波東去月西斜春蕪閣上人何在
開遍秋來滿徑花

送豹人遊吳門

雨過清江採白蘋
蘭橈目送入吳人
為余遍訪棲遲者
恐有當年梅子真

飲吳爾世齋頭待月

山堂清閨足徘徊
不厭巾車數往來
已覺新涼生岸幘
更逢好月待啣杯
懷人千里孤帆遠
落葉三湘一雁哀
白露金風無限思
客中懷抱為君開

送爾世遊廬山

送子匡山去西風
五兩輕買峯歸計
早觀瀑世緣清後

夜人千里高天雁一聲空齋秋夢遠相逐過湓城

棲靈寺第五泉

指點名泉處招提迹未湮亭空碑記在草翳井幹新漱
石明微尚臨風憶古人清泉如可薦更採澗中蘋

紅橋

草樹依微合烟波縹緲長紅橋一極目城郭半斜陽舟
渡蘋花水風薰藕葉香旗亭何處曲春怨繞垂楊

玉鈎斜

高柳平田噪暮鴉相傳此是玉鉤斜年年寒食多風雨
落盡棠梨幾樹花

瓜步夜泊送曹惟佐之濟南

渺渺清江去路分驪歌偏向客中間情親不惜頻為醉
秋至那堪又別君殘夜寒生瓜步雨征帆目極濟南雲
瑤華倘許殷勤折一寄西風塞雁羣

揚州送唐祖命之汝南

秋到蕪城暑漸微林中盡日對清暉青雲自信千秋在

白首空傷萬事非，汝水悠悠人獨往。
江天漠漠雁將飛，因君更發羈孤恨。
相送河梁淚滿衣。

題蕭晨畫

草堂枕林水，來往多清興。
終日少人行，幽鳥啼山徑。
欲訪山中人，不辨山中路。
林氣日夕深，吹作霏微霧。

贈梁木天

高城古寺靜不譁，欲落未落日斜。
使君乘暇一相訪，車騎不驚城上鴉。
桐陰數畝綠覆地，坐譚向夕多高寄。

金史卷之八
卷十
十載空違箕顙心一行且作滄洲吏君今簿領困朱顏
憔悴王郎亦此間才人屈曲復何意天路迢遙詎可攀
瓜州阻風寄崔大

一夜石尤起空洲繫艇頻定知同舍客遠憶渡江人渚
靜無飛鳥沙喧有釣綸離離京口樹烟火隔城闔

江行

楚城方薄暮北望思悠悠何事天涯客頻移江上舟蒲
帆風力駛蓮葉雨聲秋歸計滄洲晚閑心愧白鷗

大風渡江

亦畏風波惡征帆不可留晴翻江岸雪暝入蔣山秋世
事驚如浪人生轉若浮廣陵烟外路回首即并州

舟晚

逶迤一水長夜色滿疎樾時見遠林中殘霞翳新月

雲陽別討士

別君無限意南北各經過風雨朝來集江城秋氣多驚
流魚大上廢驛水空波聚散長如此愁心滿曲阿

再寄崔大

蘭若古城下思君正掩關
圍碁不知罷相對一僧閒

立秋日

小市丹徒鎮停舟問去程
到江還幾里冒雨又孤征
久客吳音改多愁楚調生
西風將木葉秋至若為聲

江干早秋懷孫豹人客吳下

已覺秋風至淮南葉漸飄
心懸揚子渡人去伯通橋
暝色邀歸翼寒江落暮潮
盈盈違一水空自摘蘭苕

江上寄許士

鳴橈不覺晚，遠樹汎寒流。
吳楚一相望，烟波始欲愁。
潮聲先報雨，江氣早知秋。
憶子雲陽道，歸帆夕未收。

江干風雨憶墨樵南下

小艇隨風溯，急湍忽驚驟。
雨薄林端遙，生瓜步孤城暝。
頓覺荷衣六月寒，越燕知秋辭客去。
江花日暮向人殘。
呂蒙城下蕭蕭壘，念爾南行道路難。

雨泊潤州城下懷貽上之淮陰

相思楚水濶相望正依依官舍終朝盡淮陰何日歸江
雲開復合秋雨息還飛應有安仁賦空憐心思違

再渡江

老作淮南客經時去復迴江禽相對浴水蓼背人開晚
棹歌相激秋濤響易哀重來還有約吹笛妙高臺

懷祖命

思君不可見落照廣陵城載酒何人過揮毫終日情竹
風殘暑退桐雨晚涼生易有窮途感秋來一葉聲

題閻修齡淮上草堂

故居汾水曲門對柳溪深正有西歸夢空勞北望心
臨淮三卜宅種樹幾成陰不及晨風翼翩翩返舊林
移家淮水上生計問漁舟舊國松楸暗高城木葉愁
晉山千里夢楚雨一堂秋久客經搖落行吟易白頭

贈孫象五

懸瓠城邊獨往時蕭然杖屨見風期客惟叔度招尋數
地近蘇門嘯傲宜勝日樽開還北海故鄉花發又南枝

新安江水明如鏡
遲爾歸來理釣絲

雨後簡無言

僧舍無行跡
纖絺掛薜蘿
風迴天籟落
棋罷暝中過
雁影南來早
秋聲雨後多
清吟良不厭
餘興屬羊何

鑒江晚行

薄暮山村繫客心
村烟一點遠相尋
林中日落留餘照
樹裡人行帶夕陰
楚塞同雲聞雁過
江城連雨覺秋深
歸時已是瑤芳歇
坐對西風思不禁

雄州道上口號

江雨新添幾尺潮
靈岩山下碧迢迢
却憐秋月如春水
柳綠波明冶浦橋

流水垂楊夾岸生
龍池風景倍淒清
秣陵關外山無數
翠髻青螺一帶明

過北譙舊里賦呈羽皇家叔

自離譙上宅南北各紛然
吳楚一千里星霜三百年
人情懷水木吾土隔風烟
時有江邊信心知大阮賢

吾叔曾持節朱幡出魏州
賜金疏傅老賭墅謝公遊山
接瑯琊勝堦生玉樹秋樽前
羣從在誰得繼風流

與天駟話舊

舊遊燕市每同車江上重逢
五載餘共歎風塵淹滯久
年年花發子雲居

班荆好為故人留風雨譙城
欲暮秋同籍弟兄多宿草
不堪重問薊門遊

古意

春絲織成絹製為素領巾皎若山上雪潔白無點塵是
妾親手作以奉君子身君心尚垂念道遠何由親持此
拂玉體如妾充下陳

貽上索艷詞入倚聲之選戲答

聽曲旗亭憶往年絲毫落處競鮮妍紅窓舊作空中語
白社新尋物外緣畫閣漫裝雲母研清歌誤拂雪兒絃
前身君是王摩詰試共叅求綺語禪

客居見桂有憶故園

紛披岩桂襲人裾
空館高涼雨過餘
忽憶故園秋色好
正當良夜月生初
花開定念淮南客
雁去曾無江上書
落盡天香君不見
坐憐芳樹日蕭疎

贈呂夢軒

京洛同遊日分攜
已十霜鳴琴看作吏
畫省羨為郎勝跡
從濠濮名山對鳳凰
此方頻水旱待發汲
公倉勝國興王地才
郎擁傳時雲中帝子
宅花外列仙祠秋色
分荆嶺春流繞芍陂
河山誰共賞莊惠有
心期

有憶

荼蘼花下解征驂
花落花開思不堪
顧我蕭郎耽作客
憶他秦女帶宜男
紅衣空老芙蓉渚
紫菊初勝玳瑁簪
安得凌風生羽翰
相隨飛雁過江南

滁州道上作

孤城遙入望
心識是南滁
地接寒烟外
人行夕照餘
豆花經雨落
禾黍向風踈
素食曾何補
生涯愧荷鋤

登豐樂亭

空梁千載古苔生一讀殘碑想太平戰壘青山無處所
居人白首不知兵亭中遺記風猶好石上流泉水尚清
何事來遊今絕少茫茫秋草暗蛩鳴

懷家兄渭臣

早結佳兒百歲歡也應嬌女待乘鸞柳花作賦何時就
桃葉宜人即次看老去漸知婚嫁累貧來轉覺世途難
從茲雲外堪長往黃葉空山禮戒壇

寄家兄仲謀

幽蘭六月吐芳滋
小婦當窻理雁絲
雨過西樓涼乍覺
青青夏簟夢熊時

悲翁仲

金城分湯湯昔之宮殿
何鬱皇縱橫南北數十里
鄧林之木森成行
貂璫貴人供洒掃
羽林三千周廬宿衛羅
四旁榮華富貴那可恃
雲烟過眼須臾耳
田父驅牛上墓門
猶說當年親見此
此理由來君莫憂
黃墟白壤皆王侯
然人魚斲漆絮南山
有隙終見求風號雨嘯
夜不

旦其中乃與狐狸遊寒烟蔓草復何有隧道悉已成田
疇石馬可羈羊可乳咄咄翁仲行及汝

暮雨

亂峯相向碧秋氣一何深片雨空中落殘陽遠在林溪
田餘白骨山驛近紅心客意方愁絕寒衣幾處砧

臨濠道中

馬首今何託龍橋此再過村烟依樹起野色捲簾多落
日有歸鳥寒林無靜柯十年印壑志心迹竟蹉跎

遊醉翁亭詩

有序

由豐山之麓折入西北過龍泉寺經柏子潭行亂
山麓葱中渡小石橋而西遂得醉翁亭亭側有老
梅歐公手植也前對釀泉水狹而清曲折行石子
中有致山上有二賢祠祀公及王元之旁二楹祀
東坡居士瞻仰其間流風斯在因低徊於亭下而
作此詩

山源不知處溪水清且深虛堂構其上醉翁時一尋政

欽定四庫全書

松栢堂全書
卷十

簡人自理不廢登與臨此事已千載清風猶至今苔石
含秀色林巒生遠心留連日欲暮空翠沾人襟

古梅

幽崖氣清冷下有梅樹叢抱茲歲寒質獨秀萬木中孤
芳信高潔千歲猶青蔥誰與植此者乃是歐陽公此樹
有時盡斯人竟何窮

龍泉寺

寺東舊設南岡
卿署西為龍潭

高林行欲盡古寺出斜曛秋草人無跡寒岩路不分樹

含卿署月龍帶講堂雲向夕鳴清磬山空到處聞

柏子潭

石篆分前代波光合遠嵐至今風雨色白日繞寒潭

清流關

幽崖窈然遠猿鳥絕躋攀神力何時鑿清流天際關千盤凌絕頂百轉見寒山不少風塵客終年此往還

竹枝詞

一自蕭郎愛遠遊追思前事攄生愁簾紋恐是湘妃竹

纔着儂身淚便流

霜降日發南譙

旅食無端歲月賒
西風白露變蒹葭
即看岩際叢生桂
早發秋來兩度花
落木聲多霜有信
采蕭人遠思無涯
愁中却憶邗江使
計日今朝已到家

和祝京兆溪南八詠

祖祠喬木

祠外脩林帶列岡
靈柯已是百年強
清陰但覺移來遠

朱果還因薦後嘗閱世年深非社木濟川才大亦沙棠
行人歎息豐尋樹指點溪南舊草堂

梅溪草堂

梅溪一曲碧江潄水白沙明好結林小築正當溪盡處
幽花不改歲寒心琴樽晚潤分嵐氣洞壑風迴引谷音
此地棲遲堪自老披裘誰屑問遺金

南山翠屏

戶外千峯巧自遭捫蘿攀葛未知勞高情自合耽邱壑

爽氣真堪散鬱陶
絕頂清秋橫晚翠
寒崖古木捲蒼濤
少文不少登臨趣
臥看南山一枕高

東疇綠遶

野色平疇入望多
披襟却受午風和
為農計早安田里
避世心深畏網羅
秋廩山中多晚食
春畝雨後有微波
相邀隣父呼新釀
薄暮柴門起醉歌

清溪涵月

誰向清溪泛羽觴
高林片月下山塘
好天涼夜四垂碧

白露蒼葭一水長勝地自然生
遠興棹歌時復散波光
幽人獨往更何處空際惟聞杜若香

西隴藏雲

西隴嵯峨枕碧岑烟霞終日鎖層陰
飄飄自結真人想
舒卷還同靜者心家在翠微長覺潤
行經蒼靄不知深
朝來欲訪山中客雲氣空濛何處尋

竹塢鳳鳴

空亭長晝足徘徊鮮碧猶從雨後栽
寒玉數聲流水靜

清陰千畝捲簾來林中客散山河遠吳下人過一徑開
今日臨風聽鶯韻置身如在鳳凰臺

山源春漲

聞道山源接隱居石梁春漲萬山餘洞門不閉桃花水
淵客曾傳薤葉書人過柳陰頻問渡舟移樹杪欲凌虛
銀鬢玉鱸懸空出不數西川丙穴魚

冒雨經六合

早向江航渡風吹水驛樓數行棠葉雨幾處稻田秋暮

色連山淨殘虹入樹流預知明日霽把酒蜀岡遊
積雨不知暮搖搖去住心山花無限色澗水有餘音牧
笛斜經隴炊烟半出林試看原上樹倦翮已相尋

秋雨

秋雨秋風著髩絲十年一夢枉尋思美人名字多稱玉
才子風流半屬詩江水難消三歲字巫山恐是再生期
梅花嶺外重重路璧合珠還定幾時

夢遊

繁英委地倩誰收花月依稀夢裡遊私會幾曾窮五夜
佳期強半屬三秋輕盈態好偏宜病柔輭情多只善愁
莫道風流天賦與一生憔悴為風流

贈房興公

香吏曾同玉女居夜來邂逅定何如偷移暮雨重陽近
低問芳齡十五餘麝月微分開靨後鴉黃輕點畫眉初
粧成欲下朱樓去更照菱波過綺疏

渡頭桃葉若為情觀裏瑤花浪得名乍可便娟迴舞態

早從嬌小辨絃聲春雲入夢屏山遠秋帳生香小簾平
曉起臨窻窺玉鏡雙蛾猶覺可憐生

送孫象五之汝寧

汝南何處是此去路倭遲草滿袁閨室烟迷叔度祠江
雲愁北望鄉樹發南枝回首鵲原上天涯有夢思

九日鑾江舟次得家報感作

長安九日憶登臨王魏同為擊鉢吟

貽上
子存

舉目山河頻

聚散故人踪跡各升沉林霜初薄孤楓樹江雁難傳萬

里心蘭菊凋零無限恨可憐歸計尚侵尋

邱壑誰教置此中飛揚跋扈為誰雄十年已自輸高密
一日還堪長薛公方外且扶紅袖老花前休遣綠樽空
明朝更向山頭看角觝魚龍舊土風



松桂堂全集卷十

欽定四庫全書

集部
松桂堂全集卷十一至
八

詳校官庶吉士臣汪彥博

助教臣常循覆勘

總校官知縣臣楊懋珩

校對官助教臣季學錦

謄錄監生臣方步蟾

欽定四庫全書

松桂堂全集卷十一

吏部侍郎彭孫遹撰

七夕立秋次飛瓊姊韻

露掌高寒爽氣浮
曝衣閣上待新秋
池頭過雨涼初集
風裏開襟暑未收
拙甚河東誰畀巧
情深楚客易生愁
晚來罷酌成高臥
清籟無聲月滿樓

秋夜送客

金史月令卷十一
客散高堂醉似泥，清宵歌枕月初西。
當窻病葉先秋墜，隔樹寒禽未曙啼。

秋夜聞梵

黃花翠竹隱禪扉，仙梵泠泠靜者機。
餘響互分清磬永，曼音輕繞定香微。
心棲止水初光發，聽入秋空萬籟稀。
已覺浮名真我累，十年出處兩無依。

中秋風雨用七夕立秋韻

風雨山堂恣拍浮，樽前節物及中秋。
佳人似月邀難見。

綺思如雲鬱未收江燕巢空垂別恨井梧葉落滿庭愁
胡床雅興今衰減懶上元規舊日樓

重陽無菊漫題次仲兄韻

涼雨迎佳序高風下夕陽籬花遲吐菊林葉緩飛霜獨
抱三閭怨孤眠五柳堂碧雲開晚岫秋水落空塘對此
情何極懷人月滿梁清吟生楚澤藻思發文房得句慙
諸從消愁有索郎攜琴待林壑明發一相將

再疊前韻

去日悲何速無因返魯陽登臨懷往昔人事隔星霜妍
唱傳花萼新聲出草堂風琴鳴澗壑天籟發林塘此曲
難追和餘音正繞梁憐余棲草澤久病藉茱房才弱題
糕客名卑執戟郎祇應游汗漫雀躍傲雲將

三疊前韻

五言多秀出昔見孟襄陽絕調今無敵枯吟夜有霜泉
明棲栗里康樂在西堂勝日時同眺平波綠到塘風高
迴雁影雲霽落虹梁惜別紅蘭路懷人白葯房夕英思

楚客秋泛憶康郎欲賦離居恨江籬或可將

秋日過博陸侯祠

尋菊無前約荒祠晚眺生疎簾邀海色虛牖落松聲鄰
犬迎門臥山僧乞食行淒涼窻下竹漫沒舊題名

東臯秋望美筇竹舊經過款樹雙扉在題詩十載多同
遊俱老大漲海尚風波晚計菰蘆穩滄洲一釣簑

九日憶羅浮

曾隨猿鶴上羅浮雲壑蕭條又暮秋落木風高清籟發

抱琴人遠碧雲收
璇房一閉難尋約
雁字無憑但寫愁
且對黃花傾竹葉
醉邀飛夢到神樓

贈湯明府

曲江當日出高車
院裏留題籠碧紗
別去久無彭蠡雁
今來新種洛陽花
芳郊雪盡春行仗
高閣香清晚放衙
解道文房詩思好
鶯聲柳色報年華

九日雨中遲客二首

小樓九日怨離羣
徙倚花前獨待君
金粟香殘秋漸老

玉山人醉夜初分空江旅雁何時到細雨清砧竟夕聞
莫寄哀吟向山木此生搖落復何云

蒼葭玉露亂紛紜秋水迢迢思正殷戲馬臺空傷霸跡
登龍人往感遺文山河久罷黃壚興湖海偏遲白雁羣
日暮所思愁不見萬重烟樹一川雲

暮秋登虎邱山讀王六考功題壁詩

偶攜筇竹上丹梯紅葉清霜氣未齊蕭日易生秋士感
脩廊重見故人題嶺雲迢遞情無賴池草生疎夢欲迷

聞在淮南愁病極行吟烟月冷淒淒

秋日過無為從叔園亭小飲次仲兄韻

何事窮登陟園亭盡日宜好山全入望紅葉半辭枝海
氣生寒早林陰欲暝遲移床就秋色珍簟坐彈棋

細雨壺觴節新霜稻蟹天但傾花下酒莫羨府中蓮弱
水垂綸外神山隱几前東溟清可挹醉即枕流眠

薄曲成吾室蕭然坐擁書新泥分幕燕真樂問溪魚地
僻便農事家貧足野蔬牆頭過升斗不惜醉淳于

秋潦空波迥寒塘野水平沙鷗眠几石山蝶舞簾旌二
屨分成侶終年嬾入城茲因麋鹿性彌欲謝簪纓

寄吳爾世

煙花三月悵離羣每到蘭時轉憶君彭蠡秋風無過雁
蕪城春樹有停雲寒砧獨客心如擣遠水雙魚手自分
慚愧故人深慰藉瑤華千里挹清芬

三秋客思繞天涯一掬瓊英感歲華慈母依然顏似玉
佳兒應已筆生花重陽定載平山酒八月誰同曲水槎

欲溯春波馳桂柁
碧桃開日醉君家

贈李將軍

少年意氣總如雲
儒將風流獨有君
越石登樓堪坐嘯
脩期下馬更能文
清秋橫海戈鋌壯
落日轅門組練分
見說

聖明思鉅鹿
論功誰似李將軍

寄懷孫無言山人

三年嶺外未歸人
每念黃山處士貧
驛路梅花千里使

江城柳色幾回春
曾從南國通蘭訊
近向西湖理釣緡
千載逋仙風味在
與君端合作比鄰

故人淮海一漁簑
家住平山枕薜蘿
秋嶠孤筇凌灝氣
春潮一葉剪迴波
貧能結客知交滿
老漸工詩好句多
却訝劉邕過耽癖
巴詞輕授雪兒歌

秋日舟行集字

微霜幾點醉楓林
小泛寒流霽色深
薄靄輕霞分隱几
虛舟淺瀨趁鳴禽
濃醅試酌情還勝
巧句難裁思欲沉

願結天隨栖菊徑可勝寥落怨梧琴

雁陣停暉晚漸歌鋤茅插棗護疎籬萬家稻黍償田事
永晝醺眠瀉羽卮漫逐朝華矜窈窕徒勞金屋致毛施
竹齋蕙館多堪共掃榻仍容數後期

洞門烟月掩清塵寂寂松蘿隔問津宿草成陰搖夜景
殘香吹夢冷秋辰行吟正擬依僧社遊處差應傍酒人
聞道雲扉近靈境扶筇不惜往來頻

初地偏餘去日悲亭臯露滿摘江籬重登梵閣歸鴉集

愁對河橋野照移臥客三湘頗話別開襟孤嶼強題詩
魚書淚盡雙文約積雨空階有鬢絲

晴收若木挂峯巔短艇回波柳榭前且向巾裙消綺思
更教花鳥寄瑤篇萍風擁砌飄亭樹蓮漏和冰滴澗泉
倘許無生酌至理同君長禮靜中禪

吳下答仲兄來韻

正有羈栖怨翻令別恨兼江風吹暮鷗壁月冷秋蟾南
土初弛擔東方未解嚴在原千里隔去國幾時淹蕭候

全吳館征衣暗露霜霸圖餘蔓草俠客老寒閨撫事留
深慨驅車訊吉占浮沉傷出處濶絕阻堂簾久抱孤生
戚仍虛寸秩沾知交星落落仕路日炎炎諧俗無長策
傳家有錦籤一官刀筆賤三世寢邱庶鵠性非關浴烏
形豈待黔余情諳寂寞天道判盈謙不假靈氛告寧煩
衆論僉行辭朱戶跡坐擁白雲匱謠詠分金屋詩書讓
玉鈐狂歌將擬楚垂釣合依詹世共探龍頷人猶將虎
髯攀援乘鼎呂呼噏耀旌幘聯步多鷗鷺登朝盡杞桮

劇秦徒尚白幕蘭心從闌縵紉形皆累山林夢亦甜吾
兄耽大隱筮易得初潛守節甘辭粟憂時託病牕居能
將菽水游或雜魚鹽孰可臣何點還能傲摯瞻滋蘭香
入佩種竹粉垂檐柏葉澆新釀槐淘飽細餽榮名藏腊
毒高位見顛跼遠性霞爭舉枯吟筆退尖冥鴻離繳弋
丈豹謝刀鉗尚友惟巢許誅茅只洞巖比來鄉思切竭
去旅愁添柳陌鶯三弄花村雨一帘早尋歸隱計春酒
話雙柑

吳中送徐六瑄朗同家兄子服歸海鹽

松陵江水去悠悠何事東還不暫留
驛路數行平望樹西風斜日繫歸舟

訥庵久遊虞山不歸寄訊

昔賢採藥處間在最高峰
靈草年年長雲深不可從

吳江寄顧茂倫

十里松陵路烟波共渺然
伊人秋水外詩思落楓前
池鴨能呼字溪魚不問錢
幽居憐歲晚瑤草日芊綿

丙午除夕即事

去年此夕南中客白鶴峰前獨賦詩鄉夢侵尋歸雁後
春愁撩亂落花時故山無恙貧皆好晚計初成隱未遲
共向東頭守殘歲夜闌兄弟說相思

松桂堂全集卷十一

欽定四庫全書

松桂堂全集卷十二

吏部侍郎彭孫通撰

元日

曙色熹微壓絳膏
朝寒隱約上綈袍
簾前花柳迎春晚
海上風雲入望高
遠寄不教慙謝奉
尺書端合讓山濤
探梅擬赴吳中約
練瀆新波泛小舠

小年朝詞十首

濃霧薄霧一時消花影瞳矐上綺寮淡日微風好天氣
小年朝勝大年朝

偏髻慵開寶鏡前像生花朵辟寒鈿宿醒未解屠蘇醉
昨夜原來是小年

繡帖雙雙榜戶來掛門紅爛錦雲堆春城無限花燈市
趁取今朝穀旦開

小除時節大寒天長臘分明及歲前七里山城三日霧
安排花雪待豐年

三朝閨閣換新粧綵勝金花紫鳳凰粉白蛾黃爭致語
人前一一道勝常

綵燕絨枝事事新競隨年例拜尊親香牋今日從何處
第一先教趨喜神

宿春三日罷晨炊漠漠厨烟傍午吹霧擁連朝打霜色
好歌飯甕譜風詩

小梅破臘一枝新紅入雲鬟亞照人從此巾幘有餘艷
春朝日日是花辰

畫閣朝寒擁蕙爐
新蟾恰對錦流蘇
修毫欲倩纖纖影
寫作春山第一圖

曉起依然倦不勝
晚來猶自睡瞢騰
待沽十日平原酒
醉到春朝看試燈

元夕雨中燈市

冉冉流光節序新
上元燈火賜酺辰
星橋遠瀉銀河水
雲幕高燒玉燭春
行雨樓臺寒不暝
卷綃宮闕濕無塵
踏歌興減諸年少
自理清商對碧筠

孝山守雄十年不遷詩以慰之

一聞越客起吳吟十載風塵惜滯淫
久任自知明主意孤飛無奈白雲心
春回山驛梅花發雨過江亭柳色深
知爾嘯歌原不廢由來傲吏極登臨

早春過子于園亭觀梅留醉

清溪一葉興堪乘十日春晴乍解凌
餐玉仙人肌是雪種梅處士跡如僧
花前且喜人無恙病後方知酒不勝
明夕更留無限憶水邊林下月初升

送沈融谷游嶺南

巾山窈窕筆山尖長圃斜堦水半淹
石墨分明如淺黛
歸時好為致香奩

增城到日夏初長丹實盈柯水滿塘
更譜新詞付珠女
新聲直壓荔枝香

人日

獻節初開未滿旬相傳此日是佳辰
釵頭燕重原非社
勝裏花明不是春
黯淡鑪陰冰作筋
低昂舞袖雪成茵

南樓目送飛鴻過欲摘瓊華報故人

花朝

殘雪緣甍霽色新曉寒清峭不知春幽蘭欲茁思公子
瑤草徒芳怨美人寥落素書歸雁後消磨綺思賞花辰
玉缸試倒如渑酒醉舞前溪白紵巾

上巳日

落英細草滿沙汀三月春殘柳未青裙屐久埋驚蟄雨
園林初展護花鈴祓除故事傳京洛觴詠風流見典型

今昔興懷多愴恨不堪重問戢山亭

送張螺浮給諫赴荆南觀察任四首

郢城高據楚江隈南紀山川萬里迴
地自湖湘分節鎮人從省掖見風裁
諫書久抗鷹鷂志幕府新收杞梓材
旦夕

聖明親總政定虛前席上中台

一鶚雲霄聳禁林迴天捧日見臣心
暫辭瑣闥名逾重遙領旌麾眷自深
楚塞西連巫峽曉渚宮南鎖洞庭陰

曲江樓上籌邊日文采風流並古今

春城芳草送離珂千里荆門擁傳過樓雉遠臨吳會壯
風煙半入蜀山多藩方委寄紆籌策江漢勲名播詠歌
暇日登臨堪坐嘯清樽皓月水微波

疊鼓凝笳使節新星槎四月溯江津雙流映帶迴仙棹
三石參差捧畫輪風起蘭臺無暘暑歌傳郢曲有陽春
湘中自昔多遺逸好為熙時網鳳麟

送朱素安隨外舅張副使之荆南

離亭芳草路春水木蘭舟冰玉堪相照瀟湘此共游煙
波愁北渚風物美南樓知爾才能賦登臨及好秋

清秋臨楚塞景物正紛紛峽雨千尋合江晴二水分商
歌酬郢客蘭桡待湘君鄉路勞回首吳天半白雲

過烟雨廢樓次仲兄韻

南湖春水碧無邊暝色垂垂落遠川何處樓臺收暮雨
欲將興廢問寒煙斜陽白苧依微見宿鷺晴沙自在眠
忽憶留題今十載綠波芳草故依然

當湖馮生四十無子命吳興沈紹繪百子圖屬

予題句其上

天上麒麟兆有無人間玉樹幾根株但教馮伉多嘉耦
莫羨商瞿五丈夫度索千春猶晚實鵲鸞九采豈凡雛
累綦採燭他年事重寫諸王作劇圖

鴛湖春泛

畫帆三尺掛春風十里鴛鴦水拍空煙鎖由拳寒漠漠
雨過南浦翠濛濛樓臺滅沒鷗波外人事興亡燕語中

想像鴟夷千載上扁舟一葉五湖東

集扇頭字成句

清興不知止偶然成一遊烟峯日送碧花澗夕生秋

秋夜

秋夜靜且永夕漏方愔愔明月照虛牖清風來樹林羅
幃颯秋意哀螢厲寒音居諸逝將改霜露行見侵感此
不能寐憂來攪我心欲起一展卷蘭膏坐銷沉徘徊待
申旦抽思生微吟

南軒曉起

曉起坐南戶寒氣忽已適渚風歷高樹入耳清飈颺山
桂花向謝石菊蒞始稠萬物各有時吾生亦何求

南軒前桂始著花

灼灼池中艷叢叢岩下枝荷枯桂始花榮落迭相為採
此芳酷烈可以媚酒卮今我一不樂達者將見嗤

張丈友松以六月十五戊子日生今年初度適
逢是日屬淨因上人索詩因有此作

長日懸弧近好秋
脩然杖笠亦風流
絳人甲子重元朔
楚客庚寅又孟陬
灼灼池花初照眼
盈盈璧月已當頭
懸知野老忘機事
聊得相從惠遠遊

暮秋過淨因上人寮

穀巾不御風秋氣
日棖觸朝來稍稍暄
步出城南曲黃菊
紛始花雲林澹相
屬淨公庭宇幽靜
外無塵俗高槐有
餘音相將布棋局
亭午不知歸忻然
煮瓶粟隨遇心自
安得食意已足行
歌自此去相送出
寒綠

大雪四首

浙瀝空階竟夕聲微聞凍雀起深更稍移寒玉敲窗重
穗冷冬缸隔幌明盈尺已知占有歲封條還得快時晴
溪山屈指梅將發擬向春前鼓棹行

短褐蕭疎可自勝不因風急壯河水四維空濶圓儀合
萬象冥濛灝氣升冷逼星機霜皎皎寒生鴛甃玉稜稜
懷人欲折瑤華贈手澁龜紋坼剝藤

飛霰散漫集山家縞夜爭明萬樹花帳裏玉顏傷歲暮

懷中瑤草惜天涯南來雁影頭先白老去詞人髻有華
一曲幽蘭清不寐竹爐閑煮碧雲茶

朔風千里氣矜兢巫子長牆沒上層吾意不妨玄尚白
人間幾見谷為陵夢迴紙帳情如水吟斷霜鐘思欲冰
徐理商歌酬郢雪一床疎影讀書燈

丁未除夕次仲兄韻

雪壓梅魂凍不興寒搖吟思劇揚凌歲時聊復書荆楚
風雪何當問灞陵海氣欲生花市雨春陰未解墨池冰

坐看兒戲成吾老殘夜空明懶婦燈

年來賦筆罷朝雲賸有新詩餉月君
曉幙當風花有信
春山凝雪玉為羣
已無金印堪垂肘
詎有瑤筌與易筋
拚倒芳樽千日醉
柳絲梅頰正繽紛

再次前韻

中夕悲歌寢欲興
紙窗風雨颯霜凌
美人憔悴傷空谷
詞客淒涼惜茂陵
復志賦成甘飲水
釋時論好不嫌冰
十年一覺青雲夢
殘雪山寮黯夜燈

曉閣初晴散碧雲春流何處遲夫君山栖近擬依宗測
田事今將問孔羣効職波臣馳桂蠹登歌郊祀頌蘭筋
不才虛老昇平世花落花開思欲紛

松桂堂全集卷十二

欽定四庫全書

松桂堂全集卷十三

吏部侍郎彭孫通撰

題螺浮觀察扇頭小影用家仲兄韻

公是人中英朝野競傾屬世道如波瀾淪胥及迴汰匪
藉五鳳手孰奠八鰲足敬歷亦云疲

主恩賜休沐城南十畝地茲焉始營築因山起臺榭高
並常杜曲乘流放釣船抽簪謝朝服心遠物自親機息

鷗相逐逍遙彌日夕愛此春波綠誰寫塵外姿盡洗綺
與縠素紈時一披清風照川麓

寄當湖趙天來陸我謀兼懷沈融谷客嶺外

湖上煙波九曲長啣盃東望思茫茫青鞵興淺春多雨
綠樹花飛水滿塘曲裏陽阿傳二妙尊前人物憶三康
嶺南歸客侵尋久空向江皋怨綠芳

病鷗鷗

鷗鷗得人愛不與凡鳥并雕籠為爾居條鉤爛然明見

飾詎不貴因之患迺嬰非無故山思時作隴坻鳴言語
或階厲巧慧亦損生置籠起三歎疇以達我情

五日偶咏

五日夏將至候氣動新籥朝來風自南薰然遍城郭晴
旭暢積陰林花弄餘灼良辰忽已及俯仰遂今昨于焉
荅時事致祀將明恪既乏升斗資彌慚魚菽薄素風幸
無墜長茲糝藜藿

微雲媚清霽杲日生牆東地偏人迹踈轉覺庭宇空綠

苗泣新露朱卉搖光風不知芳蘭葉夜來抽幾叢

宵分雨初歇曙色生東林羣鳥樂新霽飛鳴多好音吾亦自此起負手成幽尋瓜架引新蔓桂叢生密陰簷間初日落蒼蒼照我襟柴門雖日設啓閉亦何心

靜坐覽物情流光感飄迅乳燕羽已豐殘鶯語猶俊黍臙紛既陳蒲觴引初進一醉遺吾生怡然同委順

贈惺石上人

離俗何年事孤雲此其依淨巾花氎布初具水田衣吟

思秋蟬切禪心夕炷微空林人迹斷流水抱雙扉

壽李將軍

隴西推世族飛將見家風委寄專城重勲名建節同龍
文開組練蜃氣避鰲臙漲海孤烽靜陳山獨戍雄青陽
當獻節紫氣叶生崧坐嘯滄波外行春細柳中投醪千
日酒懸帳六鈞弓上壽方稱兕需才正夢熊平陽多異
數鉅鹿在

宸衷烟閣圖形像丹書誓始終功成歸隱日還得事黃

公

挽嚴母江太夫人二首

寶婺星沈月墜潭驚宮歸去罷珠函依然蕙質風猶在
欲奏蘭陔思不堪烏哺情深悲祿養鳳池人少憶飴含
他年若向茵帷啓巾簾還應洒淚探

一閉珠襦不可窺白楊丹旌有餘悲教成婉婉多璿式
名著文宣見玉儀長夜慈烏依子舍當秋孝竹發孫枝
懸知世有絲綸筆彤管清華更屬誰

送曹石苓赴上都

明鐙空館照離愁
零雨清江擁畫舟
歲晚不堪重送客
春來誰忍獨登樓
燕山木葉經霜脫
玉水冰澌帶雪流
碣石初開知見待
不應重傍酒人遊

落日寒林去路遠
此行書劔有光輝
四科人物多君俊
八斗才名起

禁闌驛路春遲殘
雪擁江關戍古夕
陽微風塵莫自傷
留滯會看相如駟馬歸

寄二兄次韻

河隄見說築宣房客子歸舟正渺茫
鴻雁一來傳遠信平安千里報高堂
新知白社圖應好舊友青霄誼不忘
猶喜交遊堪慰藉鄉心無奈白雲翔

虔州行送曾堯臬歸萬安

虔州城外二水會迢迢閩越相襟帶
此地當年苦用兵金戈鉄馬紛塵壙
太僕官兼嶺北名虎符千里壯軍聲
幕中坐嘯秋風靜樓上吹簫夜月明
身經百戰擐弓矢

五百健兒爭致死，逐北三周玉石峰。
追奔直下螺亭水，笳鼓城東夜合圍。
虔南草木極兵威，析骸豈屑乘堙告。
汲水惟看負戶歸，偃魚壓城士氣死。
天寒鼓咽聲不起，衝車一激山谷摧。
百萬齊填鋒鏑裏，章貢臺前百尺樓。
從容談笑九京遊，宋印握節心猶壯。
陽瓚沉城志未酬，兵燹頻仍經歲月。
帳前列校收遺骨，攜至荒村不敢言。
幽芳空自留碑碣，孤兒飲血赴虔臺。
九死餘生萬里迴，重繭不辭嬰白刃。
寒燐何處沒蒼苔，五雲俠客曾堯臬。

受託楊生情慨慷但說桐鄉有義風誰知溫序多英爽
意氣干雲直向前秋前獨泛入吳船忠魂歸自三千里
碧血藏來二十年萬安吳令真君子勸駕殷勤來致此
狗節捐軀古所難仁人義士今同美作歌送爾去南州
落日孤帆不可留義聲從此無終極長與西江萬古流

楔日送許靜庵之官昌邑

殘春送別惜芳菲觴詠蹉跎楔事違仙令東來鳧並舉
流人北道雁初歸幸臺蹕冷滄波合灘水沙寒戰壘稀

此去定知先撫字三齊災後歲頻飢

寄張蓼匪夫子

十年聲迹重除書豈合高懸使者車已有清風傳隴朔
何妨玄髮侶樵漁新拋組綬腰長適遠寄林泉思有餘
若使季鷹當盛日肯因秋興戀蓴魚

五湖歸去謝時賢江左風流正宛然南郡授經名益重
東山託志老彌堅庭前芳草珠為樹帳裡新聲雪作絃
掛頰啣盃清興發九峯春色碧嬋娟

贈張茂才

富平七葉張公子意氣還能傲
蒯緱腹笥定知三篋富
詞源堪挾百川流已看劒氣逢神解
豈必珠光惜暗投
見說太真居第二時名原不讓王劉

立秋日

疎雨成秋意山堂生晚涼
吟茲耽夕憇煩暑澹相忘
池葉多清響庭花有靜香
燈殘綦局罷微月正昏黃

贈大津上人

結宇離人境蕭然出世因觀空惟止水根寂見前塵階
樹寒逾翠山花暖自春安禪忘日夕逕草已成茵

早秋郎事

雨滴空林暑乍迴殘陽過雨又西頽此身已共齊紈棄
陳迹惟看越燕來青桂叢深孤吹發幽蘭花晚後時開
芙蓉零落衣裳冷楚客悲秋萬古哀

索冰修新句寫屏風上

屏間秋色似瀟湘折得瑤華座有香一自平臺賦成後

至今重得見輝光

又

團扇詩清只等閒
練裙書好未應慳
恨無庫紙三千幅
盡乞珠璣滿座間

九日雨中無菊庭桂始放次二兄韻

欲採秋英幾日閒
重陽空泛雨中杯
清霜節近花猶晚
白露天寒雁未來
彭澤久應同寂寞
小山還得暫徘徊
明須更續登高興
靈鷲峰頭待月回

寄董閬石郎次見懷來韻

秋林落木點風埃
寒雨空江日夜衰
難後弟兄多病老
霜前鴻雁尺書來
壯年俱抱懷沙痛
盛世仍虛入洛才
好賦東巡獻行在
聖朝早晚祀之萊

寄董蒼水

清霜十月下秋旻
獨立寒塘下夕曛
搖落郎看同墜葉
相思空自感停雲
騷人漫有湘纍怨
世路方悲海賈文

卷十三
遲爾華陽栖隱處竹冠松塵禮茅君

贈張明府

仙鳬初向日邊迎百里謳吟政已成行馬風傳三戟貴
懸魚節比五絲清山光近郭生朝爽海色踈簾映晚晴
花落訟庭秋似水弦風亭上有琴聲

寄冒辟疆

徵君長採北山薇皓首循陔志不違千里登堂多石友
十年偕隱有萊衣清秋日暖霜英發白墮樽濃海鶴飛

應是林泉多樂事花間時見板輿歸

歲晚書懷

山堂風雨晝瀰漫亭午猶驚短褐單雁陣初來霜有信
潮聲漸緊暮增寒未荒先業農桑在幸際

熙時出處寬無事菴裘營晚計名山隨處一蒲團

空林曉起露猶溥十月新霜試薄寒坐惜流芳長隱約
生憐香草故摧殘雨霰自照枯枰冷風牖時聞墮葉乾
曾向南能叅密諦此心何處不相安

歷落水霜共此君長從霄漢謝同羣向平有累何時盡
龐蘊無生若個聞潑墨時時研曉露繙書往往負殘曛
亦知心賞初非遠澗底流泉石上雲

一室蕭然欲傍僧燔枯酌水亦相應碧雲詩思清如水
黃葉山床冷欲冰傲雪松筠長偃蹇得霜鵬鶚自飛騰
只愁老作匏瓜繫函丈恩深少報稱

危欄凭處見新晴簷雪初消作雨聲落木聲中殘雁過
斜陽影裏暮雲生間無一字空垂老身本孤生敢較名

待入匡山依惠遠石梁秋瀑夜經行

小至日

小至天猶暖雙禽鳴樹間
藜床人晏起華戶晝長關
學道何妨懶調心只是閑
今秋幸豐熟藿食未應慳

枕上雪詩次郊叟韻

忽驚霜氣逼房櫳已覺飛
霰亂灑空夜色似明旁死
魄寒威初凜不周風夢為
蝴蝶宜同舞燈作饒魚故
不紅百感二毛應盡白吾
衰無復黑頭公

看雪次郊叟韻

紛薄山河極望中相看冰雪世情空
霜林數點寒鴉色雲木孤吟落葉風
綺思欲銷湖草碧顏顏難借酒杯紅
杖筇歸去成堅臥未許騶徒惱邵公

胥溪泉眼

一曲寒溪帶遠垞春波長漱玉泠泠
山川噴薄留泉脈雲雨迴環見地靈
月練自含珠影媚霜潭不減穀文青
扁舟試就危橋汲敲石沙頭驗水經

福業寺接梁殿

紗構凌雲自昔時
飾將文杏本連枝
花宮縹緲雙龍抱
藻井空明片月垂
哀梵繞來聲斷續
長虹舞罷影參差
諸天會有神工助
般爾無煩鬪巧思

題張遠畫十八尊者圖壽張明府

清陰白日澄秋院
梧竹寒光淡蔥蒨
素紈入手皎于雪
畫圖宛轉開生面
細若游絲颺碧空
密如弱縷排文練
筆端運處疑有神
目力窮時轉生眩
龍華會後多高賢

鴛嶺雞山記荊年嘆耶喜耶皆佛法偶然示現人天前
錫飛杯度其迹耳就中真諦誰能傳張生妙手壓周昉
繪事風流世無兩當其得意寫紈質慧筆幽情眇相賞
年來一洗粉與脂居士龍眠懺悔時白毫拂拂出十指
說法身應現畫師我亦楞伽時繫肘髮絲禪榻消磨久
乞法從無長者金逃禪但飽聲聞酒欲向天台賦應真
因風一寄玉堂人懸知今日神仙宰定是前生金粟身

松桂堂全集卷十三